

Bosna i Hercegovina
FEDERACIJA BOSNE I HERCEGOVINE
UNSKO SANSKI KANTON
KANTONALNI SUD U BIHAĆU
Broj 01 0 K 005510 11 K
Bihać, 28.06.2011. godine

Pravosnažno 21.07.2011. godine.
Presuda na osnovu sporazuma o priznanju krivnje.

U IME FEDERACIJE BOSNE I HERCEGOVINE

Kantonalni sud u Bihaću u vijeću sastavljenom od sudija Hodžić Fikreta kao predsjednika vijeća, Nadarević Fate i Kasum Suade kao članova vijeća, u krivičnom predmetu protiv optuženog Odobašić Mustafe, zbog krivičnog djela ratni zločin protiv ratnih zarobljenika iz člana 144. preuzetog KZ SFRJ, postupajući po optužnici Kantonalnog tužilaštva USK-a Bihać broj T01 0 KT RZ 0004389 11 od 13.05.2011.godine, nakon održanog pretresa za izricanje krivičnopravne sankcije a vezano za zaključeni sporazum o priznanju krivnje, u prisustvu kantonalnog tužioca Felić Nazifa, optuženog i njegovog branioca, advokata Bajramović Alage, dana 28.06.2011.godine donio je i javno objavio

P R E S U D U

1. Pravomoćna presuda Kantonalnog suda u Bihaću broj K-7/97-RZ od 27.05.1997. godine, kojom je optuženi Odobašić Mustafa oglašen krivim zbog krivičnog djela ratni zločin protiv ratnih zarobljenika iz člana 144. preuzetog KZ SFRJ i osuđen na kaznu zatvora u trajanju od 15 (petnaest) godina u odnosu na optuženog Odobašić Mustafu stavlja se van snage.

2. Optuženi ODOBAŠIĆ MUSTAFA zv. R. sin R. i majke S. djevojački Š., rođen 26.05.1972. godine u Š., općina V. K., gdje je stalno i nastanjen, JMB ..., pismen sa završenom SSS, po zanimanju mašin-bravar, neoženjen, vojsku služio 1991. godine u R. S., vodi se pri vojnoj evidenciji OMO V. K., srednjeg imovnog stanja po narodnosti ..., državljanin ..., osuđivan, nalazi se na izdržavanju kazne zatvora u KPZ ZT Zenica po drugoj osudi

K R I V J E

Što je:

Za vrijeme oružanog sukoba u R BiH između pripadnika 5. Korpusa Armije R BiH i pripadnika tzv. Narodne odbrane „Autonomne pokrajine Zapadna Bosna“ kao pripadnik 2. brigade, 1.bataljon 5 čete – IDC zv. „Golubovi“ vojske tzv. Narodne odbrane „Autonomne pokrajine Zapadna Bosna“, postupao suprotno odredbi člana 3. stav 1.

alineja a) III Ženevske konvencije o postupanju sa ratnim zarobljenicima od 12. augusta 1949.godine te suprotno članu 4. Dopunskog protokola II uz navedenu konvenciju, na način što je:

dana 18.03.1995.godine u mjestu P. – G. B., općina V. K., nakon zarobljavanja većeg broja pripadnika 5. Korpusa Armije R BiH i pripadnika policije koji su bili potčinjeni jedinicama 5. Korpusa Armije R BiH, od strane vojske tzv. Narodne odbrane „Autonomne pokrajine Zapadna Bosna“, iz stroja izveo zarobljenog pripadnika 5. Korpusa R BiH S. R. i istog udarao više puta u predjelu lica i drugih djelova tijela zatvorenom šakom i automatskom puškom sa preklopnim kundakom, od kojih udaraca je S. R. pao na zemlju da bi potom u namjeri da ga liši života u istog ispucao više metaka iz automatske puške sa preklopnim kundakom kalibra 7,62 mm, nanijevši mu pri tom više strijelnih rana grudnog koša i karlice od kojih povreda je isti na licu mjesta preminuo.

Dakle, za vrijeme rata u R BiH, kršeći pravila međunarodnog prava izvršio ubistvo zarobljenika.

Čime je počinio krivično djelo ratni zločin protiv ratnih zarobljenika iz člana 144. preuzetog KZ SFRJ, pa se primjenom istog zakonskog propisa i uz primjenu odredaba člana 41. preuzetog KZ SFRJ

O S U Đ U J E

NA KAZNU ZATVORA U TRAJANJU OD 7 (SEDAM) GODINA.

U smislu člana 212. stav 3. ZKP-a FBiH porodica ubijenog S. R. sa imovinskopравnim zahtjevom upućuje se na parnični postupak.

U smislu člana 202. stav 4. ZKP-a FBiH optuženi se oslobađa plaćanja troškova krivičnog postupka.

O b r a z l o ž e n j e

Kantonalno tužilaštvo USK-a Bihać dana 13.05.2011.godine pod brojem T01 0 KT RZ 0004839 11, podiglo je optužnicu protiv Odobašić Mustafe stavljajući mu na teret izvršenje krivičnog djela ratni zločin protiv ratnih zarobljenika iz člana 144. preuzetog KZ SFRJ.

U toku priprema za glavni pretres pred ovim sudom kao prvostepenim, u spis je uložen sporazum o priznanju krivnje zaključen između Kantonalnog tužilaštva i odbrane optuženog. Sporazum sadrži 10 (deset) članova a iz sadržaja istog proizilazi da je optuženi Odobašić Mustafa priznao da je na način i u vrijeme kako je to činjenično opisano u izreci presude lišio života pripadnika 5.Korpusa Armije R BiH S. R. koji je imao svojstvo ratnog zarobljenika, te da je na taj način počinio krivično djelo ratni zločin protiv ratnih zarobljenika iz člana 144. preuzetog KZ SFRJ. Razmatrajući sporazum o priznanju krivnje sud je utvrdio da je optuženi isti potpisao dobrovoljno, svjesno i sa

razumjevanjem, kao i nakon upoznavanja sa mogućim posljedicama, uključujući i posljedice vezane za imovinskopravni zahtjev i troškove krivičnog postupka, da postoji dovoljno dokaza o krivnji optuženog, da optuženi razumije da se sporazumom o priznanju krivnje odriče prava na suđenje i da ne može uložiti žalbu na krivičnopravnu sankciju koja će mu se izreći, da je porodici ubijenog S. R. u svojstvu oštećenih pružena mogućnost da se pred tužiocem izjasne o imovinskopravnom zahtjevu, te da je predložena kazna zatvora u trajanju od 10 (deset) godina u skladu sa Zakonom.

Kada je u pitanju krivnja optuženog, ista se temelji na dokazima koji su provedeni u fazi istrage a koji su predloženi u optužnici i to: zapisnicima o saslušanju svjedoka S. Ć., S. N., P. E., D. M., B. Z., D. Š., M. N., D. M.1 i Z. M., nalazu i mišljenju vještaka za sudsku medicinu i patologiju Rakočević dr. Miroslava, zapisniku o izvršenoj ekshumaciji i obdukciji uprave policije Bihać broj 05-1/04-5-351/11 od 12.05.2011.godine, fotodokumentaciji i crtežu lica mjesta K MUP-a Bihać broj 30/11 od 11.05.2011.godine, izvodu iz MKU Općine V. K. za S. R. te aktu Uprave policije Bihać broj 05-1/04-5-626/11 od 21.04.2011.godine.

Sud je u smislu člana 246. stav 5. ZKP-a FBiH u cjelosti prihvatio sporazum o priznanju krivnje, smatrajući da kazna zatvora u trajanju od 7 (sedam) godina u svemu odgovara težini počinjenog krivičnog djela, stepenu krivične odgovornosti optuženog kao počinioca, njegovim ličnim prilikama i ranijem životu i da je ona dovoljna ali i neophodno potrebna da bi se postigla svrha kažnjavanja u vidu generalne i specijalne prevencije.

U smislu člana 212. stav 3. ZKP-a FBiH porodica ubijenog S. R. u svojstvu oštećenih sa imovinskopravnim zahtjevom upućena je na parnični postupak.

U smislu člana 202. stav 4. ZKP-a FBiH optuženi je oslobođen dužnosti plaćanja troškova krivičnog postupka. Prilikom razmatranja sporazuma o priznanju krivnje, sud je utvrdio da se optuženi nalazi na izdržavanju kazne zatvora u KPZ ZT Zenica neprekidno od 1998.godine po drugoj osudi, te da nema nikakvih primanja niti vlastite imovine. Stoga bi po mišljenju ovog suda obavezivanjem optuženog na plaćanje troškova krivičnog postupka bila dovedena u pitanje njegova egzistencija.

ZAPISNIČAR
Husarević Fatima

PREDSJEDNIK VIJEĆA
Hodžić Fikret

PRAVNA POUKA

Protiv ove presude dozvoljena je žalba u roku od 15 dana Vrhovnom sudu F BiH a putem ovog suda.

U smislu člana 246. stav 4. ZKP-a FBiH nije dozvoljena žalba zbog odluke o izrečenoj krivičnopravnoj sankciji.